

HULANDA A APROBA RENOVACION Y AMPLIACION ARUBA CARIBBEAN HOTEL OFICIALMENTE

ORANJESTAD(AAN)—Mientras pa basta dia e asunto tabata pendiente y e luz berde di Hulanda tabata necesario pa por duna inicio na e labornan concerniente, a drenta e informe cu durante un reunion cu Ministro de Koning a sostene cu su colega Nelie Smit-Kroes, a ser dicidi pa Hulanda oficialmente aproba e proyecto di renovacion y ampliacion di

Aruba Caribbean Hotel. Informantenan a muestra cu esaki ta e promer esfuerzo di parti di Hulanda pa yuda Aruba den e situacion cu a surgi entorno e ciere di Lago. E financiamiento ta cla atravez di Bank of Nova Scotia y Nederlandse Kredietverzekering-maatschappij. E ultimo institucion financiero a laga su oposicion enfrente e

proyecto cay. E proyecto lo ta a base di un esfuerzo comun entre, entre otro, Bredero, KLM y Grupo Melchior. Manera DIARIO a relata siman pasa e hotel lo ser renova, pero tambe amplia. E edificacion existente lo ser completamente renova, mientras cu lo bay amplia e cantidad di cupo cu 150 camber mas.

Den e proyecto lo tin un suma di 25 pa 30 millon envolvi. Aruven, cu ta e compania di Gobierno di Aruba cu ta encarga cu asunto nan hotelero pa Teritorio Insular di Aruba, proximalmente lo mester bay haci su parti di trabao nan pa realizacion di e proyecto. Ta ser spera cu e promer hotel grandi di Aruba

lo ser habri, pa loke ta trata e promer fase di e proyecto, na fin di e aña aki. E construccion di e cambarnan nobo mester keda cla promer cu inicio di e temporada alto di turismo pa 1986-1987, esta na fin di otro aña. Luz berde pues a ser duna pa un proyecto hotelero cu ta importante pa e futuro desaroyo turistico na Aruba.

ACTIVIDANAN DI GRUPO MELCHIOR BAYENDO DEN BON DIRECCION

Prioridad ta ser duna na proyectonan agricola

ORANJESTAD(AAN)—Manera DIARIO a relata anteriormente, Grupo Melchior tin planes pa atraccion di inversionistanan na Aruba, caminda un cantidad di proyecto, ariba diferente tereno, lo por ser desaroya.

Segun informenan, e iniciativanan di e grupo pa trece inversionistanan y asina yuda den establecimiento di empresanan na Aruba, ta bayendo den bon direccion.

Aparentemente contacto a ser tuma cu empresanan na Israel, Sudafrica y Hong Kong pa yuda na nos isla, y resultadonan hopi positivo lo a keda registra.

Informantenan a bisa DIARIO, cu Grupo Melchior lo duna prioridad na industria agricola y den esaki ta buscando asistencia na paisnan manera Israel y Sudafrica, cu ta paisnan cu conoce e problematico di suelo arido, esta dificil pa cultiva pa motibo di segura.

Sinembargo, un pais manera Israel cu a cosecha den desierto, lo por pasa su tecnologia y conocimiento pa nos agricultornan local, pero tambe pa empresanan cu por yuda den fomento di agricultura como base industrial.

Por ejemplo, Israel cu

ta un pais cu a cultiva suelo arido di desierto cu metodonan sofisticada, manera irrigacion di drip, ductonan di awa, etc. lo por

pasa e conocimiento aki pa Aruba. Mientras e grupo lo ta cumpliendo cu su proposito di fomenta inversion

pa Aruba, informacionnan for di Hulanda ta muestra cu nunca de Koning a papia negativamente di Grupo Melchior.

Informantenan a bisa cu e labornan ta continua y tur posibilidad pa atrae inversion ta ser sondea y habri.

Santa Cruz a ripiti:

CLARINA GEERMAN REINA DI CARNAVAL 1985

ORANJESTAD(AAN)—Distrito di Santa Cruz e aña aki un biaha mas lo habri parada di carnaval ya cu nan reina Clarina

Nivalda Geerman a ser eligi ayera anochi den un RCA completamente yen como reina di Carnaval di Aruba.

Como Runnerup a keda e candidata di distrito di Paradera Marlyn Ingrid Kelly.

Ayera anochi e prome presentacion di e candidatanan tabata algo nobo y ariba e fotonan di pagina 9 di e edicion aki por mira con tur a presenta.

Durante e presentacion oficial por a nota hopi novedad tambe kibrando cu e tradicion anual den estilo di trahe etc.

Esaki a ser comenta masha positivo di parti di publico.

E aña aki un biaha mas e ambiente den RCA tabata e ambiente real di carnaval, e ambiente entusiasma di fanaticonan di cada un di e candidatanan y naturalmente e cantidad di blaasnan cu a dorna e anochi aki y e strooisclan no a falta tampoco.

Remarcable tabata e terminacion trempan di e eleccion. Tur hende a prepara pa un programa cu sigur lo termina por lo menos 12 or, pero esaki sinembargo a termina 20 pasa di 10 cu e eleccion y coronacion di reina di Carnaval.

Ta di dos aña consecutivo cu Distrito di Santa Cruz ta gana e eleccion aki. Aña pasa tabata Marisella Geerman cu a representa Distrito di Santa Cruz como reina di Connie Francis Club alavez, y e aña aki Clarina a bay cu e corona pa mantene esaki na Santa Cruz.

Tabata tambe di 9 biaha cu e corona di Reina di Carnaval ta pasa un aña na Santa Cruz, den e 31 añanan di eleccion.

Clarina I a ser corona ayera anochi pa prome mandatario di Aruba Sr. Pedro Bislip.

